
Երկար, երկար ման եկա
Ուտքով, մըտքով ես կյանքում,
Երկու, երկու բան գըտա
Չար ու դըժվար էս կյանքում:

5 Վաղո՛ւց, վաղուց կար ասված,
Բայց կյանք տըվի ես բառին.
Դարձավ, դարձավ ինձ աստված՝
Գեղեցիկը ու բարին:

Դըստրիկ, դըստրիկ իմ անգին,
10 Դու գեղեցիկ ու բարի,
Աշխույժն, աշխույժն իմ կյանքի
Եվ իմ վըշտոտ քընարի:

Նայի՛ր, նայի՛ր սըրտաբաց
էս լեն արձակ աշխարհին
15 Առատ, առատ տարածված
Գեղեցիկը ու բարին:

էսքան, էսքան մոտ ու շատ
Բախտը փըռված մեր կյանքում,
Մարդը, մարդը՝ միշտ անբախտ՝
20 Որո՞նում է երկնքում: